

**PM: Elak Penghasut Khianat Parti**  
**Mstar Online**  
**01 December, 2012**  
**Oleh ARIFFUDDIN ISHAK**

**KUALA LUMPUR:** Datuk Seri Najib Tun Razak sekali lagi mengingatkan pemimpin Umno yang tidak dipilih semula bertanding pada pilihan raya umum akan datang supaya jangan terpengaruh dengan hasutan pihak tertentu yang boleh merosakkan parti.

Presiden Umno itu berkata, parti tersebut tidak takut untuk berhadapan dengan pembangkang namun mahu semua pihak agar lebih berhati-hati dengan gejala sabotaj di kalangan ahlinya sendiri.

"Apa yang saya kuatir ialah soal kita sesama kita sendiri. Persoalan besar yang perlu kita tanya pada diri sendiri ialah sama ada anda akan sokong sepenuhnya calon yang dipilih ataupun tidak?"

"Banyak 'batu ronson' (batu api), tukang kipas yang akan 'cong' (tipu) kita kalau tak kuat iman. Mungkin mula-mula kalau sokong sepenuhnya...kemudian akan turun jadi sokong sahaja, ataupun tak akan buat kerja untuk parti atau paling teruk akan sabotaj dan lompat part," katanya.

Peringatan tegas berkenaan dinyatakan Najib ketika menyampaikan ucapan penggulungan pada Persidangan Agung Umno 2012 di sini, Sabtu.

Selain itu Najib berkata, menjelang pilihan raya umum yang akan diadakan tidak lama lagi, pelbagai kemungkinan akan berlaku sekiranya pemimpin dan ahli Umno tidak bersatu hati untuk memenangkan parti.

"Jangan lupa kita ada bekas menteri, bekas timbalan menteri yang sudah khianati kita. Dia sudah rasa nikmat ketika bersama kita.

"Tapi hari ini kerana gila jawatan dan dirasuk oleh orang tertentu dia jadi orang yang menentang Umno dan BN," katanya.

Terdahulu, Najib mengemukakan lima kemungkinan yang perlu dinilai oleh pemimpin dan ahli Umno sekiranya tidak dipilih sebagai calon pada pilihan raya.

"Saya nak bagi lima kemungkinan. Pertama orang itu akan sokong sepenuhnya calon yang dipilih oleh parti. Keduanya hanya akan sokong...sekadar sokong saja.

"Ketiga dia sudah tidak akan buat kerja, keempat dia akan sabotaj dan kelima dia akan lompat parti.

"Ini semua penting untuk kita tanya diri sendiri. Tuan-tuan cuba tepuk dada dan tanya selera," katanya.

Hakcipta Terpelihara © 1995-2012 Star Publications (Malaysia) Bhd

Source:

[http://mstar.com.my/berita/cerita.asp?file=/2012/12/1/mstar\\_berita/20121201203841&sec=mstar\\_berita](http://mstar.com.my/berita/cerita.asp?file=/2012/12/1/mstar_berita/20121201203841&sec=mstar_berita)